

Mary Potter Hospice: ko 'emau tali fekau'aki mo e Lao ki he Fili ke Fakangata 'a e Mo'uí (End of Life Choice Act)

Ko e fakamatala ko 'eni ki he tafa'aki 'oku mau tu'u aí kuo fakakaukau ia 'i ha tu'unga loloto meí he 'emau kautahá 'o kau ki ai 'a e kau ngāué, kau ngāue 'ofá mo e Poaté. Na'e tānaki fakakaukau ki ai 'a e Te Pou Tautoko, ko e kulupu tākiekina 'a e kakai Maulí (kau ki ai 'a e fakafofonga meí he mana whenua), pea mo ha kau mēmipa 'o e Kulupu Fale'i ki he Pasifikí (Pacific Advisory Group). Ko e tafa'aki 'oku mau tu'u aí

Ko e tefito'i fatongia 'a e Mary Potter Hospice ko hono tauhi, 'ofa'i 'o 'ikai fakamaaua 'a 'emau kau mahaki. Neongo 'oku 'ikai ke mau fakahoko 'a e sēvesi ki hono tokonia 'o e mo'uí ke ngatá, 'oku mau tokoni ki he kau mahaki 'i he 'enau ngaahi fiema'u ki he fakaikuiku 'enau mo'uí, 'o tatau ai pē pe 'oku nau fili 'a hono tokonia 'o e mo'uí ke ngatá pe 'ikai.

'Oku mau tu'u tafa'aki 'i he 'emau kau mahakí mo honau ngaahi fāmilí 'o tatau ai pē pe ko e ha 'a e tu'utu'uni 'oku nau fai fekau'aki mo hono tokonia 'o e mo'uí ke ngatá. 'Oku mau 'oatu 'emau tokangaekina fakalūkufua ki he 'emau kau mahaki 'oku fakaikuiku 'enau mo'uí 'i ha feitu'u pē 'oku nau 'i ai –pe ko 'i 'api, pe ko homau 'iuniti tauhi mahakí pe 'api tauhí.

'Oku mau tauhi 'a e ngaahi fiema'u 'a e tokotaha mahakí ke talotoloto ia 'i he me'a kotoa pē 'oku mau fai. 'Oku mau tokonia honau ngaahi fāmilí 'aki 'emau tokangaekina mo e fale'i ki he mole 'a e mo'uí.

'Oku 'oatu 'e he Mary Potter Hospice 'a e tauhi ki he fakaikuiku 'a e mo'uí (palliative care). 'Oku hā meí he faka'uhinga 'a e Kautaha Mo'ui 'a Māmaní 'oku 'ikai fakataumu'a 'a hono tokangaekina 'o e fakaikuiku 'o e mo'uí ke fakavave'i pe fakatolotoloi'i ai ha hoko 'a e maté. 'Oku tui 'a e Mary Potter Hospice ko e 'elito eni 'o e ngāue tauhi ki he fakaikuiku 'o e mo'uí.

Ko e tokonia 'o e mo'uí ke ngatá ko ha sēvesi ia 'oku kehe ange meí he tauhi ki he fakaikuiku 'o e mo'uí. 'Oku fakafehokotaki atu 'e he Mary Potter Hospice 'a e kau mahaki 'oku nau fiema'u ke nau fakakaukau ki hono tokonia 'o 'enau mo'uí ke ngatá ki he kulupu Support and Consultation for End of Life in New Zealand (SCENZ). Ko e kulupu faka'ofisiale 'eni 'oku 'i ai 'enau 'ilo mataotao fekau'aki mo hono tokonia 'o e mo'uí ke ngatá.

'E kei ma'u kakato atu pē 'e he kau mahakí 'a e ngaahi sēvesi 'a e Mary Potter Hospice kapau te nau fili ke fakafehokotaki atu kinautolu ki he kulupu SCENZ. 'O 'uhinga ia 'e ma'u fakatou'osi atu 'a e tauhi ki he fakaikuiku 'o e mo'uí mo e tokonia 'o e mo'uí ke ngatá 'e he kau mahaki te nau fiema'u 'a e ongo me'á ni. 'Oku toe 'uhinga foki ia ko ha fakanonga kiate kinautolu 'oku nau manavahē 'i he tokonia 'o e mo'uí ke ngatá he 'oku 'ikai kaunga ki ai 'a 'emau kau ngāué ia 'a kinautolu, pea 'e 'ikai fakahoko ia 'i he 'emau 'iuniti tauhi mahakí.

Puipuitu'á

'E hoko 'o fakalao'i 'i Nu'u silá ni 'a hono tokonia 'o e mo'uí ke ngatá meí he 'aho 7 'o Nōvema 2021. Ko hono fakahū mai ko ia 'o e tokonia 'o e mo'uí ke ngatá 'oku 'uhinga ia 'e lava ke kole 'e ha tokotaha kuo puke 'a ia 'oku ne fakakakato 'a e ngaahi makatu'unga ki aí ke ne ma'u atu ha faito'o ke fakangata 'aki 'ene mo'uí.

'Oku 'oatu 'e he Laó 'a e fokotu'utu'u fakalao ki hono ma'u atu 'a e tokonia 'o e mo'uí ke ngatá, mo e ngaahi makatu'unga ki he 'atā atu ki aí. 'Oku fakafatongia 'aki 'a e Ministry of Health (Potungāue Mo'uí) 'a hono tokanga'i 'o e Laó ko 'eni.